

## **САНХҮҮ ЭДИЙН ЗАСГИЙН ИХ СУРГУУЛИЙН ОЮУТНЫ КЛУБИЙН ТУХАЙ ДҮРЭМ**

### **1-р зүйл. Нийтлэг үндэслэл**

- 1.1. Энэхүү дүрэм нь Оюутны холбооны Үндсэн дүрмийн 3-р зүйлийн 3.1.5-д заагдсан Оюутны холбооны салбар байгууллагын түгээмэл хэлбэр болох клубийн үйл ажиллагааны зарчим, Оюутны холбооны албан хаагчидтай үүсгэх эрх зүйн харилцаа, хэм хэмжээг зохицуулахад оршино.
- 1.2. Энэхүү дүрэм нь Монгол улсын хууль тогтоомж, түүнтэй нийцүүлэн гаргасан эрх зүйн акц болон Оюутны холбооны Үндсэн дүрэм бусад дүрэм, журмуудтай нийцсэн байна.

### **2-р зүйл. Клуб**

- 2.1. СЭЗИС дээр үйл ажиллагаа явуулж буй СЭЗИС-ийн Оюутны холбооны гишүүдийн өөрсдийн санаачилгаар байгуулсан оюутны байгууллага, сайн дурын бүлгэмийг клуб гэнэ.
- 2.2. Санхүү эдийн засгийн их сургууль дээр үйл ажиллагаа явуулж буй аливаа клуб нь Оюутны холбооны Үндсэн дүрмэнд заагдсаны дагуу Клубийн зөвлөлд бүртгэгдсэн салбар байгууллага хэлбэрээр оршино.
- 2.3. Оюутны холбооны Үндсэн дүрэмд заагдсаны дагуу Клубийн зөвлөлд бүртгэгдээгүй СЭЗИС-ийн оюутнуудын өөрсдийн санаачилгаар байгуулагдсан оюутны байгууллага, сайн дурын бүлгэмийг клуб гэж үзэхгүй ба энэхүү дүрэм үйлчлэхгүй.
- 2.4. Клуб нь ажиглагч эсвэл итгэмжлэгдсэн статустай байх ба үүнийг Клубийн зөвлөлийн дүрмээр зохицуулна.
- 2.5. Клуб бүх гишүүдийнхээ дийлэнх олонхоор батлагдсан, үйл ажиллагааны зорилго, удирдлагаа сонгох аргачлал, үйл ажиллагааны үндсэн чиглэл зэргийг тусгасан дүрэмтэй байх ёстой.
- 2.6. Клуб нь аливаа асуудлыг ардчилсан, тэгш эрхийн зарчим дээр үндэслэн бүх гишүүдийн хурлаараа шийдвэрлэнэ.
- 2.7. Клуб өөрийн онцлогоос хамаарч даргалагчийн албан тушаалыг янз бүрээр нэрлэж болно. Энэ үед даргалагчийн албан тушаалын нэршлээ клуб үүсгэн байгуулах баримт бичиг болон клубийн дүрмэндээ тусгасан байна.

### **3-р зүйл. Клуб үүсгэн байгуулах тухай**

- 3.1. Клубийг үүсгэн байгуулахад долоо ба түүнээс дээш Оюутны холбооны гишүүн нэгдэн нийлж клуб байгуулах өргөдлөө Оюутны холбооны Гүйцэтгэх Хороонд гаргана. Ийн өргөдөл гаргахдаа клуб үүсгэн байгуулах баримт бичиг, Клубийн дүрмийн хэвлэмэл хувийг хавсаргасан байна.
- 3.2. Оюутны холбооны Гүйцэтгэх хороо клуб үүсгэн байгуулах өргөдлийг Клубийн зөвлөлд хүлээлгэн өгөх ба КЗ хүлээн авснаас хойшхи хамгийн эхний ээлжит хурлаараа тухайн өргөдлийг хэлэлцэх үүрэгтэй.
- 3.3. Клуб нь зөвлөх багштай байх ёстой бөгөөд нэг багш хоёроос дээш клубт зөвлөхөөр ажиллаж болохгүй.
- 3.4. Клубийг үүсгэн байгуулах баримт бичигт дараах зүйлс заавал тусгагдсан байна. Үүнд:
  - 3.4.1. Клубийн дүрэм
  - 3.4.2. Клубийг үүсгэн байгуулагчдын нэр, оюутны код болон мэргэжил;
  - 3.4.3. Клубийн зөвлөх багшийн мэдээлэл;
  - 3.4.4. Клубийн даргалагчийн дэлгэрэнгүй мэдээлэл;
  - 3.4.5. Клубийн тухайн семестрийн ажлын урьдчилсан төлөвлөгөө
- 3.5. Клубийн дүрэмд дараах зүйлс заавал тусгагдсан байна. Үүнд:
  - 3.5.1. Клубийн нэр;
  - 3.5.2. Клубийн зорилго, алсын хараа, үнэт зүйл;
  - 3.5.3. Клубийн үйл ажиллагааны үндсэн чиглэл;
  - 3.5.4. Клубийн гишүүнчлэл;

- 3.5.5. Клубийн дотоод бүтэц зохион байгуулалт;
- 3.5.6. Клубийн санхүүжилт
- 3.6. Клубийн үүсгэн байгуулагдсан эсэхийг зөвхөн Оюутны холбооны Удирдах зөвлөлийн тогтоолоор шийдвэрлэх ба үүсгэн байгуулагдсаныг зөвшөөрсөн тохиолдолд тусгай гэрчилгээ олгоно. Энэхүү гэрчилгээг Оюутны холбооны Тэргүүн болон Клубийн Зөвлөлийн дарга /Дэд Тэргүүн/ гарын үсэг зурж, Оюутны холбооны тамга дарж баталгаажуулна.
- 3.7. Гэрчилгээний загварыг Удирдах зөвлөлөөс тусгайлан батална.
- 3.8. Клубийн үүсгэн байгуулагдсаныг зөвшөөрөөгүй тохиолдолд Оюутны холбооны Удирдах зөвлөл зөвшөөрөөгүй шалтгаанаа дэлгэрэнгүй тайлбарлах үүрэгтэй. Клубийн үүсгэн байгуулагдахаас татгалзах дараах үндэслэлүүд байна. Үүнд:
  - 3.8.1. Клубийн үүсгэн байгуулах баримт бичгийн бүрдэл (3.4) дутуу байх.
  - 3.8.2. Клубийн зорилго, үйл ажиллагааны үндсэн чиглэл (3.5) тодорхой бус эсвэл хоорондоо уялдаагүй байх.
  - 3.8.3. Клубийн үйл ажиллагааны үндсэн чиглэл нь Монгол улсын хууль тогтоомж, Санхүү эдийн засгийн их сургууль дээр мөрдөгдөж буй дүрэм, журам, Оюутны холбооны Үндсэн дүрэм болон бусад дүрэмтэй харшилсан нийцгүй байх.
  - 3.8.4. Бусад

**4-р зүйл. Оюутны Холбооны бүрэн эрхийн тухай**

- 4.1. Оюутны Холбооны Удирдах Зөвлөл /Цаашид УЗ гэх/ нь клубийн тухай дүрмийн дагуу дараах бүрэн эрхийн хүрээнд ажиллана. Үүнд:
  - 4.1.1. Клубийн асуудал эрхэлсэн УЗ-ийн гишүүн /Цаашид КЗ-ийн тэргүүн гэх/ нь оюутны клубүүдийн үйл ажиллагааны ерөнхий бодлого, чиглэлийг клубүүдэд дэвшүүлэх;
  - 4.1.2. УЗ-өөс клубүүдийн үйл ажиллагаанд зарчмын хориг тавьж болох бөгөөд энэ нь үндэслэлтэй байна. Тус үндэслэлийг УЗ КЗ-ийн тэргүүнээр дамжуулан клубүүдэд хүргэх;
  - 4.1.3. 4.1.2-т заасан зарчмын хоригийн үндэслэлийг клуб хангалттай гэж үзэхгүй бол УЗ-д гомдол гаргаж болох бөгөөд УЗ уг асуудлыг ажлын 3 хоногт багтаан хэлэлцэж хариу өгөх;
  - 4.1.4. УЗ болон клубийн хоорондын маргаан шийдвэрлэгдэх боломжгүй гэж үзвэл Оюутны Холбооны Хяналтын зөвлөлд хоёр талаас санал гомдол гаргах эрхтэй.
- 4.2. Оюутны Холбооны Гүйцэтгэх Хороо /Цаашид ГХ гэх/ нь клубийн тухай дүрмийн дагуу дараах бүрэн эрхийн хүрээнд ажиллана. Үүнд:
  - 4.2.1. Клубт Оюутны холбооны Үндсэн дүрэм, Клубийн тухай дүрэм болон клубтай холбогдох эрх зүйн акц, шийдвэрийг тогтмол танилцуулах.
  - 4.2.2. Клубийн үйл ажиллагаа явуулахад зөвлөгөө өгөх, дэмжлэг үзүүлэх
  - 4.2.3. Клубийн үйл ажиллагааг олон нийт, бүлгийг хамарсан ил тод нээлттэй байлгах талаар арга хэмжээ авч ажиллах.
  - 4.2.4. Клубийн гаргасан шийдвэр СЭЗИС-ийн оюутнуудын эрх ашигт нийцсэн эсэхэд хяналт тавьж ажиллах.
  - 4.2.5. Клубүүдийн үйл ажиллагааны төлөвлөгөө, төсвийн болон үйл ажиллагааны тайлангийн загварыг бэлдэж УЗ-өөр баталгаажуулах;

**5-р зүйл. Клубийн бүрэн эрхийн тухай**

- 5.1. Оюутны холбооны УЗ-өөс дэвшүүлсэн чиглэлийн дагуу төвлөрч үйл ажиллагаагаа уялдуулан ажиллах;
- 5.2. Оюутны Холбооноос санаачилж буй бүх нийтийг хамарсан үйл ажиллагаанд зөвшилцөн хамтран ажиллах;
- 5.3. Үйл ажиллагааныхаа үндсэн чиглэлд тусгагдсан үйл ажиллагааг тасралтгүй зохион байгуулан ажиллах;
- 5.4. Клуб өөрийн өдөр тутмын үйл ажиллагааг бие даасан, хараат бусаар зохион байгуулах;
- 5.5. Клубүүд нэгдсэн байдлаар элсэлт авах ба хугацааг КЗ-өөр шийдэх бөгөөд ОХ-ны УЗ-өөр элсэлтийн журмыг батлуулах;

- 5.6. Ашгийн төлөө үйл ажиллагаа зохион байгуулахгүй байх;
- 5.7. СЭЗИС-ийн эзэмшил анги танхимыг Оюутны холбооны болон СЭЗИС-ийн холбогдох дүрэмд харшлахгүйгээр ашиглах, эзэмших;
- 5.8. Хэрэгжүүлж буй хөтөлбөр, үйл ажиллагаандаа Оюутны холбооноос клубийн нийтийн эзэмшлийн эд зүйлсээс авч хэрэглэх;
- 5.9. Аливаа төсөвтэй болон төсөвгүй бүх үйл ажиллагааны төлөвлөгөөг ГХ-ны ДХА-нд семестер бүрийн эхний 2 долоо хоногт багтааж өргөн барих;
- 5.10. Аливаа төсөвтэй болон төсөвгүй бүх үйл ажиллагааны үндсэн үйл ажиллагаатай холбоотой тайланг тухайн үйл ажиллагаа дууссанаас 2 хоногийн дотор ГХ-ны ДХА-нд өргөн барих;
- 5.11. Бүх үйл ажиллагааны мөнгө санхүүтэй холбоотой тайланг тухайн үйл ажиллагаа дууссанаас хойш 2 хоногийн дотор Оюутны Холбооны Санхүүчид өргөн барих;
- 5.12. Үйл ажиллагаа явуулахтай холбоотой постер сургуулийн орчинд наахад ГХ-ны ДХА-нд мэдэгдэж, постер наах хугацаа, байршлыг тодорхойлуулж, тухайн үйл ажиллагаа дууссанаас 1 хоногийн дотор хурааж авах;

**6-р зүйл. Клубүүд, Оюутны Холбоо хоорондын харилцаа, баримтлах зарчим**

- 6.1. Клубийн дүрмийн дагуу үйл ажиллагаагаа явуулж байгаа клубийн дотоод хэрэгт Оюутны Холбооны гишүүн хөндлөнгийн хяналт тавих ба шаардлагатай тохиолдолд ОХ-ны УЗ-ийн гишүүд оролцож болно;
- 6.2. Клубт тулгарч буй зарим бэрхшээлтэй асуудлуудыг КЗ-өөр хэлэлцэж болох ба бусад клубүүдээс тусламж авах;
- 6.3. Клубүүд өөрсдийн сайн дурын үндсэн дээр нэгдэн нийлэх эсвэл үйл ажиллагааг хамтран зохиох, өрсөлдөн ажиллаж болно. Энэ үед хоорондын хамтран ажиллах гэрээ хэлцлийн хувийг ГХ-ны Дотоод хэргийн албанд хүргэх эсвэл хамтарсан төслийг КЗ-д өргөн барих;
- 6.4. Сар бүрийн үйл ажиллагааныхаа тайланг КЗ-ийн ээлжит хурлаар өөр хоорондоо мэдээлэн туршлага, мэдлэг солилцох замаар харилцаа холбоогоо сайжруулан, нягтаршуулах

**7-р зүйл. Санхүүжилт**

- 7.1. Клубийн дүрэм журамд заавал санхүүжилтийн талаар тусгаж өгөх бөгөөд түүнийхээ дагуу клуб санхүүжнэ. Дараах эх үүсвэрээс санхүүжиж болно. Үүнд:
  - 7.1.1. Гишүүдийн хандив, хураамж;
  - 7.1.2. Оюутны хандив;
  - 7.1.3. Оюутны холбооны КЗ-өөс батлуулсан төсөв;
  - 7.1.4. Иргэд, байгууллагын хандив, төслийн хэлбэрээр санхүүжих;
  - 7.1.5. Хуулиар хориглогдоогүй бусад хэлбэрээр тус тус санхүүжих боломжтой;
- 7.2. Хөрөнгө санхүүгийн зарцуулалтад санхүүгийн эх үүсвэр олгогч субъект, байгууллага, ОХ ба бусад хуулийн этгээд хяналт тавина.

**8-р зүйл. Клубийг татан буулгах тухай**

- 8.1. Клуб нь Клубийн тухай дүрэмд болон СЭЗИС-ийн дотоод журмуудад нийцээгүй үйл ажиллагаа явуулсан эсвэл хууль тогтоомжийг зөрчсөн ноцтой зөрчил гаргасан үед УЗ итгэмжлэл хураах эсвэл татан буулгана.
- 8.2. Татан буулгах шийдвэр гаргасны дагуу тухайн Клубийн Гэрчилгээг хураан авна.
- 8.3. Клубийн үйл ажиллагааг зогсоосон мэдээллийг ажлын гурав хоногийн дотор ГХ-ны гадаад харилцааны алба нийтэд мэдээллэнэ.

**9-р зүйл. Дүрэмд нэмэлт өөрчлөлт оруулах**

- 9.1. Дүрэмд Оюутны холбооны Удирдах зөвлөл нэмэлт, өөрчлөлтийг хийнэ.
- 9.2. Дүрэмд өөрчлөлт оруулах саналыг Клубийн зөвлөл хэлэлцэн КЗ-ийн даргаар УЗ-д өргөн бариулж болно.

**10-р зүйл. Дүрэм хүчин төгөлдөр болох**

- 10.1. Энэхүү дүрмийг 2019 оны 04 дүгээр сарын 08-ны өдрөөс эхлэн даган мөрдөнө.

